

Penyasaran subsidi sudah dibincang sejak 25 tahun dulu

Anwar dedah semua PM terdahulu bersetuju, namun tidak dilaksana

Oleh Mohd Nasaruddin Parzi
bhnews@bh.com.my

Putrajaya: Dasar subsidi bersasar yang dilakukan kini pernah dibincang dan dipersetujui oleh pentadbiran negara sejak 25 tahun lalu, tetapi tidak dilaksanakan kerana ia tidak mudah dilakukan.

Malah, kata Datuk Seri Anwar Ibrahim, semua Perdana Menteri terdahulu bersetuju perlu ada penyasaran subsidi, termasuk ketika beliau menjadi Menteri Kewangan.

Perdana Menteri berkata, namun langkah itu tidak dilaksanakan kerana pimpinan ketika itu lebih memikirkan soal kesan politik, selain penyasaran subsidi ini sendiri tidak mudah dijayakan.

"Dasar (penyasaran subsidi) baik. Semua Perdana Menteri dari dulu setuju mesti ada penyasaran subsidi. Perkara ini dibincangkan ketika saya jadi Menteri Kewangan dulu.

"Lebih 25 tahun yang lalu sudah dibincangkan perlunya penyasaran subsidi, tapi tak upaya dilakukan kerana (ia) tak mudah. Biasanya pemimpin politik ini dia fikir kesan kepada pimpinan.

"Apa pun kalau tarik subsidi atau naikkan cukai memang membebankan. Itu pandangan politik," katanya berucap pada Majlis Perhimpunan Bulanan Kementerian Kewangan (MOF) di sini, semalam.

Hadir sama, Menteri Kewangan II, Datuk Seri Amir Hamzah Azizan.

Mengulas lanjut, Anwar yang juga Menteri Kewangan berkata, kerajaan yakin langkah diputuskan itu baik, khususnya untuk memastikan subsidi negara hanya diberi kepada mereka yang layak.

"Dalam pertimbangan kita (kerajaan), kita sudah buat keputusan yang baik, iaitu sementara kita harus bantu rakyat majoriti, kita tak seharusnya beri subsidi kepada golongan maha kaya, industri besar dan orang asing.

"Bukan diskriminasi kepada



Anwar berucap pada Majlis Perhimpunan Bulanan Kementerian Kewangan di Putrajaya, semalam. (Foto Mohd Fadli Hamzah/BH)

orang asing (tetapi dilakukan) kerana orang asing tak bayar cukai, cukai levi yang (dibayar) sangat kecil.

"Kita teliti (ketika melakukan) dan dalam Jemaah Menteri pun hampir setiap minggu mendapat liputan dan perkembangan untuk pastikan pelaksanaan (penyasaran subsidi) ini berkesan," katanya.

Terima kritikan

Justeru, Anwar berkata, beliau menerima segala kritikan serta kecaman atas keputusan dibuat kerajaan dalam menyusun semula agihan subsidi negara.

"Selain parti dalam Kerajaan Perpaduan, setakat ini nampak kenyataan daripada pimpinan PAS agak lunak, tidak menentang, hanya memantau, tiada masalah kerana pembangkang harus pantau pelaksanaan dan kita juga harus pantau.

"Oleh itu, kita harus faham langkah sebaiknya ialah memberi bantuan kepada yang berhak. Tanggungjawab pertama kita adalah kepada rakyat kita," katanya.

Sejak kelmarin, media sosial dipenuhi dengan kritikan netizen terhadap keputusan kerajaan mengapungkan harga diesel.

Selain itu, Anwar juga berkata, penjimatan RM4 bilion yang diraih menerusi penyasaran semula subsidi diesel akan dibelanjakan bagi menampung keperluan kos pengangkutan awam dan Sumbangan Tunai Rahmah (STR).

Katanya, kos bagi STR yang kini memanfaatkan sembilan juta penerima mencecah RM10 bilion.

"Wang (penyasaran subsidi) itu bukan untuk naikkan elaun menteri atau kementerian lain.

Penyasaran subsidi ini untuk pastikan ia tidak diberi kepada maha kaya dan warga asing.

"Kalau diesel sebahagiannya untuk menampung keperluan pengangkutan awam, pengangkutan rakyat, sebahagiannya untuk tambah suntikan tunai rahmah.

"Skim Sumbangan Asas Rahmah (SARA) naik daripada RM300 kepada RM700. Bayangkan STR untuk sembilan juta orang yang (dapat) *direct cash* subsidi, itu (jumlahnya) RM10 bilion," katanya.

"Ini langkah ketiga terbesar. Pertama tarif elektrik, kurang kontroversi kerana kita selamatkan 85 peratus rakyat, ia terkena hanya kepada golongan tertinggi 15 peratus ke atas dan warga asing yang kita dapat jimatkan RM4.5 bilion setahun.

"Pengapungan (harga) ayam membabitkan belanja RM1.2 bilion setahun. Bayangkan dari zaman dulu, setiap kali menjelang musim perayaan mesti naik harga barang, maka kita beri subsidi untuk sederhanakan harga," katanya.

Perdana Menteri berkata, langkah kerajaan mengapungkan harga ayam misalnya, menyaksikan tiada kenaikan mendadak sepanjang musim perayaan lalu.

Pada masa sama, katanya kerajaan akan memantau tahap inflasi kesan daripada pengumuman penyasaran subsidi ini bagi memastikan rakyat memerlukan termasuk golongan rentan tidak terbeban.

Ahad lalu, kerajaan mengumumkan harga diesel akan diselaraskan mengikut pasaran semasa bermula semalam, dengan harga permulaan di semua stesen petrol di Semenanjung ditetapkan pada RM3.35 seliter.